

T 3188/0.83

81

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 17 1940

湖南通志卷之一百十六

哈佛大學漢和
圖書館珍藏印

人物十

岳州府

秦

羅氏子府志古羅城人失其名父為鐵官舟沒洞庭
子年十二與其姊循涯求父尸不獲皆赴水死後人
每於陰雨時見其姊弟抱尸湖上隨波往來雲氣覆
之因建淑濟祠以祀宋元豐間勅封為孝感侯淳祐
間平江令楊寅建忠孝雙廟與屈原分東西祀之

唐

裴隱一統志字逸人臨湘人居白馬磯與李白相友

善官侍御挂冠歸與岫道人鼓琴自娛李白亦嘗至其處相與倡和宴遊

宋

張尙祖府志臨湘人咸平壬寅進士累官至節度使平章軍國事聲績在李昉畢士安之次幼弟尙陽選尙英宗昇平公主熙寧初卒賜葬祭

鄧雅湖廣通志字彥正平江人身長八尺博覽史傳尤熟孫吳兵法張詠鎮蜀辟與俱往王均反雅分兵攻取所向輒克知黔州黔南熟蠻反招降二千八百戶位至御史中丞贈太子太保

胡墳姓譜字寅仲平江人嘗從軍有功補修職郎佐

蜀帥帥有二心墳曉以大義帥憚不敢發墳卒帥遂

反蜀人哭墳有詩曰公如在瀘上謀必寢淮南

黃誥一統志字君謨平江人熙寧進士授長沙簿章

惇開淳山請增畝稅誥力請罷之後知益陽縣中使採木至益陽遣二卒勾典押而無引牒誥杖而遣之丁父憂廬墓三年芝生墓前凡六十餘本哲宗時賜帛五十匹官至太府卿

方廷堅府志字持正臨湘人元豐八年特奏策試授尙書省承務郎調戶曹叅軍天資端慤博通經史百氏之書元祐間卒

李黻一統志字元明臨湘人博學通經性至孝葺養

浩園隱居不仕自號默堂居士授徒數百人晚年尤精內典著詩文五千篇名兌齋編

李曦縣志平江人元符三年進士歷官都官郎中行誼純篤殫心盡職哲廟嘗優異之

郭鴻楚紀字儀仲平江人政和中登進士授澧陽令歲饑捐俸賑民擢奉議郎中

羅孝芬楚紀平江人字廷颺宣和間登進士甲科仕吏部郎中靖康初致仕歸

吳景偲湖廣通志平江人政和進士授辰州刑曹職平獠寇秦檜當國屢欲致之力請外補尋以薦召對乞正權綱定國本謹邊防修兵政厚風俗開言路高

宗嘉之累封武昌縣開國男

李平西楚紀平江人父純皇祐中進士有賢名平西元符中進士知澧州專務德化集民訓以孝弟勸事農桑化洽州邑累遷樞密院承旨金師至平西與宰相李綱奏守禦策又乞詔諸道勤王兵決策一戰時相何桌不能用

李璠一統志字草堂平江人朱子帥長沙璠往受業李祀一統志字良仲平江人從朱子遊集池州語錄

李儒用一統志字仲秉平江人長於春秋朱子帥長沙與邑人吳雄同受業於門往復辨難今語類中多其問答學者稱練谿先生

吳雄一統志字仲英平江人居臨安師朱子深明性命之學歸建陽坪書院日講學於其中平江之知學者皆雄教之學者稱陽坪先生

毛友誠一統志字伯明平江人聞康叔臨得伊洛之傳避世岳陽因徙家巴陵往從之時李璠分教岳陽極爲敬禮學者稱竹簡先生

方暹一統志字明甫平江人李璠弟子與饒伯輿張元簡同門相善元簡極重暹嘗遺書曰伯輿明理而達於事明甫見事而中於理吾以斯道望伯輿以斯世望明甫

許炳一統志字仲明平江人通春秋好學不倦篤志力行及卒無以爲殮

魯仕能一統志字時舉平江人從饒魯學終身不見喜愠之色

萬鎮一統志字子靜平江人學於方暹饒魯與魯仕能齊名魯謂仕能曰天下讀書者伯易第一子靜次之伯易鄱陽人亦其弟子也

鄒輓一統志字孝行平江人朱子帥長沙道出平江以書謁者甚衆輓獨見禮甘貧悅道力學不事生產其卒也方輓爲之棺殮

方輓一統志字叔行平江人受業李璠與饒伯輿友善安貧樂道前後徵聘皆不赴魏了翁題其所居曰

學齋

許應寅姓譜平江人與弟應廷有文名同登紹定二年進士應寅尤以操行著

葉伯清縣志華容人好施與淳祐間於縣城南江上捐造鐵索橫江連船二十四隻以濟行人費數千金邑人賴之

嚴珽姓譜字玉甫華容人性嗜學才識高邁言論侃侃爲劍南節度使剖析無滯察案服其能兵民懷其惠文章事業咸著於時卒於官

劉寶姓譜華容人岳飛將嘗從破楊么有功及飛遇害寶遂散其部曲隱居華容山卒

嚴錡湖廣通志華容進士以詩名家與安陽韓瑒齊名應試有鴻鴈來賓賦一時傳寫蚤天當時惜之

李用庚縣志字季簡平江人咸淳七年進士天姿高邁生平以范文正魏了翁自勵登第時同年毛士宜客死臨安用庚率鄉士經紀其喪且護之歸時論偉之初授潭州教授以楚帥汪立信薦擢知潭州惟務以禮義養人心尋致仕祀鄉賢

吳祿午縣志字季亨平江人咸淳七年進士與其師李用庚同科時楚士登第者不乏人惟祿午師弟聲撼全楚釋褐授咸寧簿戊寅元兵渡江守節不屈卒死王事祀鄉賢

劉用杰府志華容人寶曾孫淳祐末蒙古伯顏率兵南下先遣騎傳檄所在至華容杰方置酒張樂不爲動騎脅之賊怒目大詬曰汝不聞吾劉氏先世欲殲者誰耶罵不絕口遂被害

徐偉一統志臨湘人宋末舉孝廉事母至孝有司累辟不赴去之野潭山中隱居教授依以居者三百餘家歲荒貧不舉子者悉資給之人感其惠子多以徐爲名有子八人後皆知名時號徐氏八龍

方興一統志字義軒臨湘人宋亡與張世傑文天祥共圖恢復以功加招討使死崖山之難

陳寧國湖廣通志字安世巴陵人澧陽丞韓世忠辟爲裨將討賊劉忠馬武追至靜江有功尋病卒

陳一發湖廣通志字春卿巴陵人年十六升上舍以薦供奉翰林宋亡歸故山青林洞吟咏自娛號雲岫先生

元

丁濬湖廣通志字國器巴陵人以鄉貢授河南通判遷鞏昌同知爲人重厚質實自少至老敦行不怠鄉族重之居官守已臨民皆有法進四品服俸卒

鞠志元楚紀巴陵人至順癸酉會試中書省試蒲輪車賦號稱雅贍至元間官宜都令按舊通志作鞠志誤

方敏中湖廣通志巴陵人年十二通經書春秋義潛心嶽麓遺教書其室曰自明軒從遊者教以克己爲要高尚不仕見臨川江漢叙錄

劉天澤府志華容人寶五世孫學問淹博以文武才薦爲荊州路教授轉防江都統

王榮忠

縣志作榮川

府志岳州人至正間授江西同知時

興國會昌盜起力戰克之賊復集攻雩都榮忠乃收銅鐵鎔爲液澆其營賊大潰走贛境悉平祀鄉賢

張琦一統志臨湘人生二歲而母劉氏遭亂陷於兵

父必達不復娶琦稍長思其母輒歔歔泣下及冠請

於父往求其母徧歷湖南北淮東西數歲不得後求

得之於池州貴池迎歸奉養其後十餘年父母相繼

沒終喪猶蔬食事聞旌其門曰孝義

胡天游楚紀名乘龍以字行平江人博學高志遭元

季亂遂抗志不仕養晦岩谷所著有傲軒集

顏耕道楚紀平江人讀書博古以詩賦鳴於世尤善

草書不樂仕進築室黃山號林泉野老卒年八十六

高允中府志華容人有膽畧元末丹平把馬丹行諸

士官叛道梗洪武初允中請於帥自往招降諸酋事

聞授副長官卽監其地三所寧謐百年賴之

明

徐文斌湖廣通志字執中華容人洪武初舉經明行

修授本學訓導遷武昌教諭博通經史喜談兵法方
元末風俗不振文斌與同里劉必宏力維持之後當
事以文武才薦於朝徵詔甫下文斌已卒

李祥府志字君祥臨湘人元末紅巾賊起率里人保
捍縣境洪武初以功授鎮撫守禦岳州路隨師征蜀
破黑松寨尋卒於瀘州贈昭勇將軍諡忠愍

萬慶孫府志字君善臨湘人篤行好學洪武初舉孝
廉授大名府知府

姚明善湖廣通志臨湘人洪武中以歲薦授監察御
史成祖定北都明善建議疏河開運朝命協同平江
伯陳瑄經度地勢築壩引泉及諸閘啟閉功居多祀

平江伯祠

方琇府志臨湘人博學尙氣節洪武七年以人才應
辟授邢臺隴岡遞運所副使建文時燕兵起檄徵餉
抗不應永樂改元謫戍順德衛卒子孫隸軍籍家焉
權衡府志臨湘人襲世職屯縣城生平忠勇自許建
文時燕兵起所至從風而靡衡獨與其子洪浩衍三
人保城併力抗拒比成祖立棄家逃陝之三原宣德
中乃歸

方必壽府志巴陵人洪武乙丑進士歷官陝西按察
使操履堅確祀鄉賢

尹縻府志華容人博學強記淹貫經史洪武間屢舉

經明行修不就永樂改元薦修高廟實錄逃之雲南
十載始歸

岳奎姓譜臨湘人洪武中舉孝廉授監察御史爲人
端方廉潔閭里奉爲典型

陳堅湖廣通志臨湘人洪武中舉孝廉知長樂縣時
兵燹民飢堅請發粟賑之全活者衆又奏立守禦千
戶所創建城垣民至今賴之

周階湖廣通志平江人通春秋永樂初薦經明行修
以母老辭不就所著有井蛙遺響

丁元貴湖廣通志平江人爲部從事永樂初尙書夏
原吉護駕北巡元貴實從行豫籌餉道有功原吉薦
之除戶部郎以剛直稱

孟善府志華容人少從軍以驍勇著歷官燕山護衛
千戶永樂初以功累擢至都督同知封保定侯卒贈
勝國公諡忠勇

王廷玉一統志字致美巴陵人父必壽洪武進士歷
官按察使以政績著廷玉永樂進士改庶吉士遷工
部郎中時燕京創造上節儉休養二疏擢浙江右布
政致仕楊溥稱其質實而文和易有守

蕭授一統志華容人以千戶從成祖起兵積功至都
督僉事永樂中充總兵官鎮守湖廣貴州在鎮二十
餘年討平苗蠻數十部威信大行進左都督卒贈臨

武伯諡靖康

郭永清湖廣通志巴陵人永樂辛丑進士官工科給事中出使外藩不屈而死永清有逸才詩多雋語

李雋一統志字邦傑華容人宣德中由鄉貢歷官彰德知府趙王每出郭禱祀遊獵數百里雋上疏言之上遣內史逮治並賜勅褒獎解綬歸卜居黃湖山足跡不入城市

喻原英府志平江人正統六年出穀一千二百石助賑事聞於朝勅勞羊酒旌爲義民仍免戶役成化間其孫金亦出穀一千二百石勅旌如例

趙弼府志巴陵人正統間授漢陽教諭淹博羣書祀鄉賢

蔡山府志字安石華容人好施與不責報正統十四年輸穀數千斛助邊詔旌其門閭

雷浩縣志字士宏華容人景泰癸酉鄉貢授池州府同知池陽沿江洲渚多屬勲戚家往往侵奪民地浩至疏論魏國奴甚力奴許賂以金堅却弗受凡與競九載卒以誣歸殘書敝裘而已

劉仁宅一統志字廣居華容人永樂舉人知瑞昌縣蠲赤湖課二萬緡免沿江之逋米十餘萬減民稅之耗於巨室者數千石晉廣西按察副使景泰中思明都指揮黃玠殺其兄珊仁宅廉得狀玠懼使人奉手

金爲壽且擁兵數萬相挾制仁宅至南寧玠子來謁
伏甲縛之論玠死玠陰遣人京師營幹得釋罪旣益
橫乃捃撫他事中仁宅仁宅委政去歸裝惟七金楊
榮過其家見牀上只蒲蓆布被喜曰所操若是可謂
真御史矣以子大夏貴贈兵部尙書

鄧廷瓚一統志字宗器巴陵人景泰進士知淳安縣
有惠政遷太僕丞擢知貴州程番府政令平和民苗
感悅孝宗初累遷右副都御史巡撫貴州有平苗功
以左都御史提督兩廣軍務兼巡撫亦有聲績召掌
南京都察院廷瓚有雅量世稱長者其所設施動中
機宜卒贈太子少保諡襄敏

傳說湖廣通志平江人親喪廬墓六年植木成林猶
不忍去

董廷圭楚紀華容人景泰庚午鄉試第一辛未進士
拜監察御史守白羊口劾守帥橫暴者清軍河南檢
出通伍凡五萬人又災異數見疏陳再災十事陞山
東副使清理滯獄出三十餘人廉正持躬家無長物
武毅明統志華容人累官都督僉事爲叅將守廣西
智勇過人馭下嚴明平兩廣黃蕭養及修仁荔浦諸
寇毅戰功居多

譙謨姓譚華容人有才學能賦詩隱居不仕以吟咏
自娛天順初遊京師石亨欲薦之乃逃歸鄉里邑縉

紳學士咸禮重焉

黎淳一統志字太僕華容人天順初進士第一官至南京禮部尚書為人狷介寡合鮮所依附敦倫紀崇節儉其所樹立即幽隱無愧有門生知華亭遣以紅雲布淳却之題其緡曰古之爲令植桑拔麻今之爲令織布添花人服其操卒諡文僖

程萬里姓譜華容人天順丁丑進士授吏科給事申上疏言用賢圖治疏通人才慎選風憲皆切時政恤刑山東白囚者寬捕得正犯置之法衆皆稱神累陞戶部侍郎卒朝廷遣官諭祭萬里居官三十餘年諫草成帙所至有遺愛輒立祠祀之

劉志通府志平江人天順七年出穀一千石助賑事聞勅旌爲義民同時邑民喻中肅喻復初各出穀有差並予勅獎

余瑛湖廣通志

舊志作徐瑛誤

平江人早喪父家貧奉母僞

居郡庠就廩母卒扶柩歸葬遂廬於墓有富俠盜葬其旁訴於官盜者厚償以金瑛曰瑛非圖金爲母骸不可棄也雖死不淪盜者愧而遷之居三年有烏集芝產之異成化間知府李鏡具其事聞於朝旌之劉滄府志巴陵人天順間歲貢知蒼梧縣時兵荒流徙滄爲拊循安集百姓得所

方宗秩湖廣通志巴陵人通春秋一試不第遂歸隱

澆貫諸史尤善詩耕桑樵採自食其力析疑問字者多於隴畔求之天順間知縣袁綱以經明行修舉不就

吉泰府志岳州人天順間知崇信縣愛民禮士革弊除奸徭賦均平崇人祀之

蔡玉實府志字德充華容人由歲貢授沛縣教諭誘進寒士居家謹厚睦族恤鄰祀鄉賢

劉大夏明史列傳字時雍華容人年二十舉鄉試第一登天順八年進士選庶吉士成化初館試當留白請試吏乃除職方主事再遷郎中明習兵事曹中宿弊盡革所奏覆多當上意尙書倚之若左右手汪直

好邊功以安南黎灝敗於老撾欲乘間取之言於帝索永樂間討安南故牘大夏匿弗予密告尙書余子俊曰兵釁一開西南立糜爛矣子俊悟事得寢朝鮮貢道故由鴉鶻關至是請改由鴨綠江尙書將許之大夏曰鴨綠道徑祖宗朝豈不知顧紆迴數大鎮此始有微意不可許乃止中官阿九者其兄任京衛經歷以罪爲大夏所笞憲宗入其譖捕繫詔獄令東廠偵之無所得會懷恩力救乃杖二十而釋之遷福建右叅政以政績聞遷廣東右布政使田州泗城不靖大夏往諭遂順命後山賊起承檄討之令獲賊必生致驗實乃坐得生者過半改左移浙江孝宗六年春

河決張秋擢大夏右副都御史以行乃自黃陵岡濬賈魯河復浚孫家渡四府營上流以分水勢而築長隄起胙城歷東明長垣抵徐州亘三百六十里水大治孝宗嘉之賜璽書褒美召爲左都御史歷戶部左侍郎兼左僉都御史往理宣府兵餉初塞上糴買必粟千石芻萬束乃得告納以故中官武臣家得操利權大夏令有芻粟者自百束十石以上皆許勢家欲牟利無所得不兩月積儲充羨邊人蒙其利明年秋三疏移疾歸築草堂東山下讀書其中越二年廷臣交薦起右都御史總制兩廣軍務清吏治捐供億禁內外鎮守官私役軍士盜賊爲之衰止十五年拜兵

部尙書南京鳳陽大風拔木河南湖廣大水京師苦雨沈陰大夏請凡事非祖宗舊而害軍民者悉條上釐革十七年二月又言之帝命事當興革者有司據實以聞乃會廷臣條上十六事皆權倖所不便者相與力尼之帝不能決下大夏等再議得旨制下舉朝歡悅時多災異上諭羣臣各陳缺失大夏乃復上數事其年六月再陳兵政十害且乞歸帝不許命弊端宜革者更詳具以聞於是大夏舉南北軍轉漕番上之苦及邊軍困敝邊將侵扣之狀極言之召見便殿面陳諸弊乃下詔嚴禁大同小警帝用中官苗達言將出師大夏與閣臣劉健等贊止之每被召跪御榻

前帝左右顧近侍輒引避常對久憊不能興呼司禮
太監掖之出武宗嗣立請汰傳奉武臣六百八十三
人正德元年乞按治鎮守中官董讓等貪殘帝不悅
大夏自知言不見用數上章乞骸骨其年五月詔加
太子太保賜敕馳驛歸給廩隸如制大夏忠誠懇篤
遇知孝宗忘身徇國於權倖多裁抑嘗請嚴覈勇士
爲劉瑾所惡劉宇亦憾大夏遂與焦芳譖於瑾欲籍
大夏家九月假田州岑猛事逮繫詔獄瑾欲坐以激
變律死都御史屠滹持不可李東陽爲婉解瑾亦詞
大夏家實貧乃坐戍肅州大夏年已七十三布衣徒
步過大明門下叩首而去觀者太息泣下父老攜筐

送食所至爲罷市焚香祝劉尙書生還比至戍所諸
司憚瑾絕餽問儒學生徒傳食之遇團操輒荷戈就
武所司固辭大夏日軍固當役也五年夏赦歸瑾誅
復官致仕大夏歸教子孫力田謀食稍羸散之故舊
宗族預自爲壙志曰無使人飾美俾懷愧地下也卒
年八十一贈太保諡忠宣

方昇府志字啟東臨湘人由岳州衛籍中成化乙酉
鄉試第一丙戌進士少失怙嘗爲母負米百里躬親
稼穡以養比登第授御史首劾輔臣之不職者忤旨
被譴時以真御史稱之復職歷按山東四川浙江上
救時政九十餘款劾奏權臣妖僧及外戚奉旨親加

拷鞫昇高聲面陳無所迴避上亦為之動念既下獄僚屬交疏救免遂外補江西提學副使便道過家十日而卒囊篋蕭然惟衣服一二襲而已初按浙還朝中官有謗之者上命禁衛官校止於途檢囊無他物乃免前後逮繫幾死者三而曾無怨悔惟以諫諍為已任祀鄉賢

劉綸府志臨湘人成化乙酉舉人知四川灌縣誠心為政九載秩滿士民請於當道願借一年比歸攀轅泣送皆不忍舍灌人祀之名宦萬歷庚寅祀鄉賢謝綱楚紀巴陵人成化己丑進士知萬安縣民有鄔江兩姓強梗不供租綱諭以利害革心為良擢監察

御史清軍四川時以得軍數多少為課殿最綱初不干進無所枉抑按河南平冤獄糾墨吏擢山東副使卒

卜馬祥明統志岳州人成化中任指揮同知流賊掠洞庭馬祥奮身督戰死

胡湘縣志字朝宗平江人成化甲午舉人授榮昌知縣矜釋疑獄甚得民心其父道輝隱居以清白教家湘守庭訓自筮仕以遠里居一介不苟取在任二年歸惟圖書數卷

曾仲魁縣志平江人事親孝謹父母卒哀毀骨立各廬墓三年

徐貴明統志平江人舉人授潼川州同知甘茹清苦
泄政嚴明後以忤臺官謝政歸灌園種蔬終老諄飭
周慎不失尺寸鄉里目爲古君子

王和府志平江人爲縣吏成化十三年流賊掠境從
知縣宋鑑勦捕鑑被害和力戰死之邑人嘉其義醜
祀宋公祠

白忠府志字舜臣華容人成化乙未進士知溧陽縣
甫下車值歲歉疫忠躬爲調藥分賑民賴痊活僅七
閱月卒於官垂危猶力疾理寃獄出數人於死貧不
能具棺父老爲之殮舁其喪歸更爲立祠祀之

黃節縣志字文仲華容人成化丁酉鄉貢性廉靜有
大志屢上春官不第銓爲廣州府通判計使娼縛巨
盜費叅不煩寸兵商舶致番利甚都餽以半力却之
商爲立生祠祀焉擢肇慶府同知擒巨盜馬文堅并
其黨數千人御史上其績進福建鹽運使司同知逆
瑾竊柄吏皆競輿金希速化鹽司積金如山竟一錢
不入遂落職致仕歸

叢永璿一統志字宗哲華容人成化進士授戶部主
事督餉宣大陝西大饑奏蠲稅四十萬接濟邊儲全
活數萬人擢郎中出守西安府以禮化導俗漸循謹
文案立剖庭無宿牘先是西安歲織絨服進用中官
橫取百姓苦之永濬疏論其害不報擢浙江叅政卒

陳俊府志字廷傑臨湘人成化癸卯舉人授成都知縣數月即棄官歸祀鄉賢

黎民表府志字本端華容人淳次子成化甲辰進士歷官廣西布政使清介有守不阿權幸仕宦垂三十

年囊無私積大學士李東陽楊一清皆其父門下士比二人執政民表偃然無故交意以不善干請故每

遷輒外補補必邊徼地後入覲卒於京邸祀鄉賢

譚讓府志字汝卿華容人成化丙午鄉貢授南昌府通判以廉著改衢州府討桃源賊有功擢雲南昆陽

州知州以疾歸

陳上策縣志華容人母病割左臂肉煑為羹以進母

尋愈上官嘉獎之

白起且一統志華容人由貢生知雞澤縣有廉幹名興起文學濬開井渠民賴焉比入覲坐臥一牛車不

宿旅店夜大雪盈車中晨起敝簾短衾皆沾濕起且無忤色

柳應辰姓譜巴陵人成化己丑進士歷官刑部郎中擢四川兵備副使改補河南進山西按察使歷江西

陝西布政使陟副都御史巡撫蘓松以不附劉瑾隸繫詔獄瑾敗復職致仕

王儼一統志字民望華容人成化進士授工部主事統理呂梁洪鑿石開渠便舟楫徙民居瀕河者數百

家陞四川成都知府治行為天下第一歷官陝西右布政寇逼西固城儼督餉區畫旬日得芻粟九十餘萬擢戶部右侍郎攝太倉事革中官常例錢崇玉訟民田又請黃河退灘及寧陵免稅地上命儼往覈田當為民者咸歸之復疏河灘實民產免稅非祖訓不可許皆如其議轉左侍郎覈外戚侵民官地數萬畝奏成其監奴於邊武宗卽位儼上疏乞致仕得歸居無何劉瑾亂政捕繫詔獄鍛鍊無所得矯詔謫遼東戍瑾誅赦還

周澄字原潔巴陵人李東陽周君墓志澄生有奇質受書鄉塾兼通法律有用世志湖廣布政使司嘗缺

知印以名為府縣所薦黽勉就役有為布政者雅器許之或諷以政務亦稍稍自見授廣州府倉大使勤會計慎勾稽宿姦斂手不得肆則相扇為浮詞構以罪按察分司不能直君具疏懇諸朝下御史按察姦狀事乃白起內艱遷浙江上虞主簿地衝要多賦訟皆剖析得理嘗攝餘姚縣事民間君至輒相率共賦役不督而辦叅政何宜檄領京儲兌運事舊時悍卒多怙勢侮民民代補耗虧為所困君悉意規畫益嚴為約軍民皆稱便何嘗與論水利至夜分不寐嘆曰能官也九載將去父老合詞請留於御史及布政按察例以未報政不許比上吏部考入優格復起外艱

擢兩淮都轉運鹽使司知事署秦州及淮安二府分
司兼掣淮安鹽貨嘗攝篆事事皆集諸場戶白於都
御史張公瓚再被獎諭聲益振然亦坐劬勞得疾卒
於官年五十有九

方賓府志字仲光巴陵人孝宗己酉舉人正德間授
鳳陽通判會山東盜起奉檄督兵禦淮築靈壁虹縣
二城賊至不得渡縱擊大敗之殲其酋楊虎賊初敗
時賓料其必趨鎮陽令預設伏賊果至再敗之乃散
去尋攝守篆閱獄囚有臨淮商爲舟人所圖讞久不
決賓畧詰之卽得其情鳳陽故有陵寢中官帥府守
陵之卒撓法難治賓至帖然賊旣平御史上其功詔

旌異未及還而卒祀鄉賢

顏頤壽楚紀巴陵人孝宗庚戌進士授寶坻令改淇
縣拜監察御史宸濠謀不軌副使胡世寧發其奸上
命崔元偕頤壽往勘因會師事平遷刑部侍郎進禮
部尙書改戶部先是武宗南幸彌久儲餉浩繁頤壽
奏留歲漕數十萬石人心始安遷左都御史掌刑部
隆慶初加太子太保

柳尙義明統志巴陵人孝宗己未進士累陟遷都御
史以忤逆瑾除名瑾敗復起叅政

胥文相一統志字士衡巴陵人孝宗進士知漳浦縣
蝗螟爲灾禱之越境去歲更穩又疏罷銀坑之稅累

遷南戶部郎中歷汀州柳州知府多政績

周銘湖廣通志臨湘人性剛方輕財重義孝宗時歲大饑銘前後出穀千餘石賑濟邑人多賴存活旌其門曰義門

姚文宣湖廣通志臨湘人孝弟力田三世同居郡守李鏡榜其名於旌善亭提學蔡潮嘉其行誼爲書百忍堂

楊一清明史列傳字應寧本雲南安寧人父景化徙家巴陵成化進士歷山西提學副使轉督陝學孝宗時擢左副都御史督理陝西馬政河套告急尙書劉大夏薦一清撫次經畧防禦創紅古等城以捍之一

清有謀善斷所居之處時演習營陣安化王寘錡反拜陝西總制與太監張永共出師寘錡就擒與永計誅劉瑾入內閣加少傅尋致仕遂依婦家居鎮江久之世宗嗣位詔以故相行邊後復入閣上方勵精圖治中外事一咨委焉八年請老贈金帛明年削籍卒諡文襄贈太保

黃鳳翔府志字凌元巴陵人崇禎末父被賊擄鳳翔傾家產得千金徒跣齋任求釋於賊賊感其孝俾與父歸

劉文祥湖廣通志華容鄉貢授臨水令改印縣居官廉慎及歸置義倉以贍族人卒年八十餘

周廷用明列朝詩傳字子賢華容人正德辛未進士知宜黃縣入爲御史未一載備兵四川進江西按察使請囑不行入覲都御史汪鉉摘黜之廷用氣倜儻豪岸爲御史言事多觸時忌及爲監司不善迎合失權近意有八匡集若干卷

陳能湖廣通志華容人正德甲戌進士官延平知府有平賊功陞廣西叅政性坦易謙挹不言人過人稱長者

傅尙文一統志字元質華容人正德進士任大理評事武宗南巡與同舍郎上疏諫捕繫錦衣獄跪午門拜杖左遷戶部照磨嘉靖初還舊職累遷江西副使

余坤府志字月田巴陵人登正德己卯鄉薦由蕪湖教諭累官至江西道監察御史隨駕巡邊奉差四川招撫流民數萬尋致仕歸坤爲人正直清廉尤以孝著祀鄉賢

方鈍府志字仲敏巴陵人正德庚辰進士初知華亭縣累官至戶部尙書時邊費浩繁苦心接濟在部六載題疏數十萬言以忤權相乞歸隆慶初進階遣官存問萬歷間復賜存問卒贈太子少保諡簡肅在京時建岳陽會館居鄉築柴荆楓樹二隄祀鄉賢

孫繼芳一統志字世真華容人正德進士授刑部主事東廠獲數人誣爲盜下刑部論法繼芳白其冤改

兵部員外武宗將南巡繼芳偕武選郎黃鞏率諸部
寺屬百餘人諫止捕繫廷杖武庫郎陸震笞死繼芳
裹瘡力治震喪官終雲南提學副使子宜字仲可爲
文千言立就舉於鄉以父喪哭泣損目遂不復會試
自號洞庭漁人構亭著書興至把筆書所爲詩奇異
飛動所著詩三四百卷宜子斯億字兆儒七歲能賦
詩年十四爲諸生事祖母及母以孝聞以著述自任
隱元石山中誅茅蔬食充然自得學使董其昌稱之
曰德範如太邱豪俠如朱游云

蕭一中一統志字執夫華容人正德進士知新城縣
擢監察御史疏援馬錄逮繫詔獄謫廣西按察司照

磨遷分宜知縣忤大學士嚴嵩幾罹禍遷東昌同知
歷南刑部郎中復以在新城時劾夏良勝大禮疏草
再貶饒州府通判後歷官右副都御史巡撫四川
黃昭道一統志字文顯平江人孝宗進士知長山縣
歲蝗禱於神雨雹立作蝗盡死遷南京御史正德中
論劉瑾廷杖除名瑾誅擢江西僉事宸濠招亡命劫
彭蠡諸處昭道捕獲數百入訊治如法旋遷雲南叅
政諭曉緬甸諸蠻咸懼修貢分守普安討賊有功遷
布政使

余大乾一統志字健之平江人弱冠爲諸生食廩饒學
問該博言動有則以例貢成均縉紳多重其行誼

法南通志 卷之十一
喜賦詩所著有石潭存稿和杜律稿鄉人欽其德量私諡曰溫靖先生祀鄉賢子廷湖嘉靖癸卯舉人

劉福 凌義 周曉 劉仲榮 縣志俱平江民兵正

德十四年宸濠初平餘黨自江西入寇邑之恩溪諸鄉劉福等奮勇擊賊皆死於陣當事惜之並附祀宋

公祠廡

夏旻 府志平江人正德中知彭縣勤勸農桑有粟產五畝之瑞偶蝗入境旻竭誠以禱忽百鳥食之而滅朱潮 府志字字海華容人補郡學生談理學清修篤行動必以正嘉靖初曾爲大禮議主爲人後之說後尊號詔下郡守命潮齋行屬邑潮執弗行

張守約 湖廣通志華容人嘉靖丙戌進士官淮安知府聞命卽遣家累攜二僮以往闢園種蔬自奉儉約常捐歲俸以賑乏絕淮爲商賈輻輳之地素號難治守約以清節鎮之民用馴服

程宗舜 湖廣通志華容人嘉靖辛卯舉於鄉事母哀氏以孝聞刻意著書至忘寢食垂二十年有洪範淺解律呂或問

謝上箴 府志字以善華容人嘉靖壬辰進士知成都縣有廉聲擢刑部主事歷官建寧知府益矢清白尋罷歸仕宦二十餘年貧乏莫能自給

陳楚坤 府志平江人由諸生授河南布政司檢校嘉

靖間大饑出穀千石錢十萬賑之監司檄旌其義
陳安府志字允恭平江人嘉靖間歲貢由萬安教諭
遷梁山知縣素以孝著母病割股以療比知梁山會
土寇方五爲亂殺戮無算積骨滿野安捐貲瘞之且
保聚其失所者百姓德之祀鄉賢

孫斯億三楚文獻錄字兆儒華容人年十四補弟子
員入之上書督學棄諸生衣巾着華陽巾渡江如淮
覽京口三山歷姑蘓泛錢塘徘徊會稽天目之間返
憇金陵歷豫章再遊京師日與世外人交不袖一刺
卽有知者過之亦未嘗報謝還訪鹿門登泰山南謁
衡岳東入郢北遊蘇門百泉嵩高所至遍覽各勝悚

慨懷古長嘯高歌人莫之測時王元美汪伯玉吳明
卿徐子與諸人各以其業自雄意不可一世士然靡
不倒屣延致斯億掉臂其間傲然無所屈歸華容誅
茆蒔竹往元石山中蔬食閉關墨客緇流無間晨夕
頽然自放遂以是終居母喪有盜晝入護棺泣盜惻
然避去年六十終

劉祖修湖廣通志華容人大夏子不第隱於山足跡
不入城市敦睦宗族人無不愛敬者學臣高其行奉
恩例欲冠帶之祖修辭不受

湯玉廉湖廣通志平江人父病篤割乳肉煮粥以進
遂愈其後裔曰教饒於財而能散嘉靖甲申歲旱散

粥賑饑有司以尚義旌其門

李本意府志字幼誠平江人嘉靖丙午舉人知大名縣時漳水暴漲廬舍衝塌一空本意發倉穀一千七百又請他郡公儲二千石賑之不足借滑縣官銀市麥散給流離之民賴以全活歷官南戶部主事乞歸唐世韜縣志字阜岑平江人由吏員効力兵部以討復河套有勲事功授四川岳池典史時奉採木旨按派各州縣額世韜力爲請減岳池得免長材十八件百姓德之撫軍黃光升薦其才可大任格於朝議不果子應運由選貢歷官安居知縣有廉明聲

余大淳府志字天民平江人由歲貢歷官澠州雲南二府通判清介有聲家居憂時俗日靡力敦古處以率鄉鄰壽百歲卒

艾穆一統志字和甫平江人嘉靖舉人累遷刑部主事錄囚陝西時政尚嚴苛詔決不如額者罪穆據爰書情確者決二人張居正奪情穆與主事沈思孝抗疏極論忤旨廷杖遣戍西寧久之起員外卽累進僉都御史巡撫四川有平寇功

邱萬瓊縣志字國華平江歲貢任訓導中嘉靖戊午鄉試授河南桐栢知縣審雪誣盜有聲少與兄萬璣並著才名長詩古文詞感時憂國時見吟咏熙亭艾穆比之李獻吉何仲默萬璣亦以舉人任知縣專講

學術

范鍾湖廣通志臨湘人少篤學善吟咏中嘉靖壬子鄉試官邵武同知父母年八十乃乞養歸

楊邦憲府志巴陵人嘉靖壬子舉人以通天文歷法授欽天監博士神宗郊天偉其儀容擢御史累官山東按察使致仕歸祀鄉賢

姜廷頤一統志字以正巴陵人嘉靖進士知餘干縣擢御史按通州京師告警與都御史王忬乘城三日

疏七上遷淮陽兵備副使是時江北取民無制廷頤行一條鞭法遂為善政累官兵部侍郎

謝登之一統志嘉靖進士累官工部尚書立朝清介自持同列咸憚之

方啟參按舊志字少岳巴陵人嘉靖戊子舉人官河

東都轉運使歷任至山東右叅政性敏達廉慎嘉靖末乞歸閉門著述隆慶初再召用連疏復歸

沈錦府志字重華臨湘人篤學力行不求榮進或詰之錦曰下士晚聞道將以自修耳嘉靖間大疫比鄰

不相過錦獨臨問遍飲食之竟亦無恙祀鄉賢沈鎮湖廣通志字仲威臨湘人世有淳德正德十三

年邑令議建迎恩橋鎮首輸白金五十兩穀五百石助役嘉靖三十四年大饑其仲子廷建助賑一千五

百石都御史表其廬

艾而康府志字太冲平江人父科以鄉舉歷蘓州教授少聞庭訓矢志道學長棄舉子業遊京師受業於吉水鄒德溥參究性命之奧

喻萬全府志平江人萬歷十三年大饑出穀二千石以賑都御史建坊表之

黃元會府志字昌期平江人萬歷戊午舉人授寧州知州有惠政崇禎末流賊破城抗節不屈死之

程謨湖廣通志巴陵人事繼母以孝著萬歷戊子歲荒設粥濟饑全活千餘人年八十二終

黃清府志巴陵人萬歷間任台州通判有幹才值颶風大作海塘悉圯當事薦作嘉興同知督理海塘得

砌石法又鑄鐵獸以鎮潮開濬裏河以通料運時稱能吏

蕭時逢湖廣通志巴陵人會川巡檢居鄉施藥餌給轉積買山作義冢萬歷戊子春洞庭風作覆溺者四十餘人時逢悉斂而瘞之大守王灤表其宅

李紹春府志字元陽平江人萬歷戊子舉人授崇仁知縣先是邑多浮糧為累紹春履畝丈量均之且葺書院修縣志多有惠政歷官鬱林知州

彭岡湖廣通志平江人萬歷己丑大饑岡捐粟倡賑且上書於縣令勸富人出粟以濟貧乏岡非素封而好義鄉人尤德之

沈鳴雷府志字禹陽臨湘人萬歷己丑進士歷官廣東按察副使涖治清廉居家孝友祀鄉賢

孫羽侯府志字鵬初華容人斯億子萬歷己丑進士授翰林庶吉士歷禮刑二科神宗詰責臺省罷科道官四十人羽侯與焉里居閉戶著書崇禎初祀鄉賢

張存意湖廣通志華容人萬歷壬辰進士由戶部遷山西僉事會播亂廷議推存意監軍身親行陣左臂中流矢元戎劉綎親爲拔之受事五閱月旋底定口不言功廕贈弗及貴州建忠勲祠祀之

楊紹儒湖廣通志臨澧人少習舉子業不樂仕進力田教子篤於友誼析產時舉其私囊悉分與昆弟置田以贍族人甃橋以濟行旅以子一鵬貴封太常少卿祀鄉賢

湯浙湖廣通志臨湘歲貢爲淳化令生平行檢修飾事母至孝母危疾日侍湯藥衣不解帶御史朱瑞登表其閭

楊一鵬湖廣通志臨湘人萬歷庚戌進士授辰州府推官播酋新定復叛一鵬按轡行撫遂帖服會採辦皇木轉運出陝一鵬禁科派平價直作兵木二議蜀人德焉歷吏部文選典試陝西轉大理寺丞忤逆瑞奪職璫敗起原官管尙寶司丞事上疏言諫官不可太重武臣不可偏輕門戶不可私立上嘉納遷太常

少卿轉兵部左侍郎署戎政尙書摘發奸弊屢疏劾襄城伯李守琦冒餉濫官廢弛營伍之罪陞戶部尙書總督漕運兼巡撫鳳陽等處甲戌流寇蹂躪中州一鵬請專設鳳撫以固陵園事寢格不行後獻賊殘毀一鵬言始驗而坐失守以死愍帝追悼詔復原官所著有陽春閣疏稿運事摘要

楊一位按舊志字元韻臨湘人生數月而孤事嫡母許氏至孝母卒廬墓性醇謹以德化人鄉里稱長者工古文詞一時金石碑版文字多出其手歲薦任湘鄉學博遷江夏諭致仕以子柱朝貴贈文林郎

楊一廉湖廣通志臨湘人恩貢任商水縣清介自守

調樂平卒時僅帶一圍做衣數襲祀河南名宦

王朝元府志臨湘人生三歲而孤母改嫁江右客遺朝元鄰居陶人撫之長遂精陶冶鄰攜傭於江右年十六卽棄陶訪母久之遇於建昌奉以歸後母卒朝元絕粒七日不死自此目不交睫日惟飲水一盂亦不困餒人以爲異

沈植湖廣通志臨湘舉人歷官僉事歲饑與弟棊榜各輸穀千石以賑詔建坊旌之祀鄉賢

沈廷燧湖廣通志臨湘人捐穀賑荒開誠化盜家藏書萬卷屬纊時悉出以貯學宮

周一宮湖廣通志臨湘人年四十喪妻不再娶後舉

於鄉任資陽有賢聲

徐興詩縣志字克成平江人性慧善文行檢維謹初
入邑校卽以德行文學稱由選貢授郟縣訓導教誘
諸生務爲古學士風丕變當路交薦之尋卒祀鄉賢
喻廷禮府志平江人家世好施萬歷三十二年邑缺
穀種廷禮出穀千石散給鄉鄰有司旌爲義門

姜性一統志字初蒙廷頤子萬歷進士歷刑科給事
中居諫垣兩歲前後疏凡百八上皆切中時弊又請
於青泥灣水次置倉厥免湖南歲兌武昌蘄州漕費
鄉里稱便

余良弼湖廣通志巴陵人由鄉舉授登封教諭改交
河遇畿輔歲饑條陳救荒八事全活百萬戶轉東光
令治行爲三輔最尋遷延安郡丞修城堡申斥埃軍
政肅然

唐世柱一統志字擎元巴陵人少孤事母至孝萬歷
舉人知濟寧州歲旱步禱雨立降增先賢仲氏祭田
振興名教官終戶部員外郎

張珪湖廣通志巴陵人萬歷進士官刑部主事時御
史馮恩論大臣得失都御史汪鉉欲置之死珪執奏
得末減遷太平守值旱蝗令捕蝗者給以穀民爭捕
之蝗遂盡守鎮江擒盜有功累官至廣西叅政珪沉
毅人不可以私干

張一隆湖廣通志守約子由鄉貢知南充縣廉潔誠確南充士大夫懷之

孫穀府志字子穉華容人羽侯子萬歷丁未進士授杭州推官累遷副都御史巡撫遼東以病告歸孫氏自繼芳至穀五世皆以文章顯著弟穀慤亦有文名王宏道湖廣通志華容人萬歷己酉舉人官安義令性慈惠不忍笞民復以狷介失上官意旋改歸困窶常不能舉火年七十五終不能殮親舊爲具後事白竹府志字長倩華容人萬歷庚戌進士累官至建昌守以廉著有嫠婦訟冤竹爲直之忤御史移監司廄詰竹不自白解印綬庭前明日且束裝歸矣監司

大驚挽謝不可里居十餘年尋起瓊州守清介如建昌時擢粵東提學副使未抵任卒無子建昌瓊州皆祀名宦崇禎壬申祀鄉賢

蔡之琬府志字西公華容人父長年以萬歷戊午鄉舉爲安縣令坐失守城池論辟之琬徒步走京師上書訟父冤父得免死

方良俊湖廣通志臨湘人苦志力學以選貢歷羅江教諭羅居蜀萬山中林泉幽邃宴遊唱和無虛日遷魯府紀善不赴所著有風景玉淵集十七史摘異並詩文若干卷

吳采府志字魚山臨湘人例貢授安慶府經歷敦尚

孝友手自置產推與庶弟均分與族鄰和平樂易有長者風

胡鵬舉府志字而上平江人天啟甲子舉人授贛州府推官治獄輕重得情管權稅清羨金八千以充賑恤分毫不私尋以外艱歸

劉希文一統志華容人天啟中以貢生授興文教諭流賊陷城縣令張振德被害希文暫署縣事賊復至誓死不去與其妻白氏同殉

魏文昌一統志華容人事母至孝父獲罪繫武昌獄文昌年十八詣闕上疏願以身代報可臨刑謂其弟曰謹事二親如吾生存時也

張純府志華容人好施與有典揭者歲荒輒焚其券嘗輸穀千石助軍國費詔旌其門

文燠府志字木生華容人崇禎庚午舉人有才名授南部知縣未一日獻賊圍城誘之降燠書諸葛未亡猶是漢伯夷雖死不從周二語於署乘間破圍而出歷遷太常卿後棄官歸

張希奎府志字星若華容人崇禎甲戌進士歷官監察御史好讀書持躬以正居官敢言奉母尤以孝著聞

房如京府志字赤石巴陵人崇禎間歲貢授建昌通判居官嚴毅不可干以私歲荒賑活甚衆遷成都同

知有惠政尋卒蜀人祀之

丁聖時湖廣通志巴陵人家貧力學崇禎間以進士授溧陽令清兌糧宿弊定淮鹽水運修城浚池省刑興學轉袁州府推官分校江南江西鄉試所拔多知名士陞戶部主事子全芳舉人

李世第府志字三捷平江人崇禎十五年土寇許定凡聚眾數千糾合流賊破城殺弁踞邑半載官兵不能戢世第散家財募勇士數與賊戰克復縣城都郵史何騰蛟上其功授副將尋致仕

江禹合湖廣通志巴陵人獻賊殺掠積屍以萬計禹合捐貲立義塚收葬之司理戴吉人過而流涕題曰

萬枯壟

李興瑋一統志巴陵人崇禎時拔貢獻賊破岳州父請兵其母泣止之不顧後一家俱遇害興瑋隨巡撫章曠圖恢復死難於衡陽

黃鳳翔府志字凌元巴陵人崇禎末父被賊擄鳳翔傾家產得千金徒跣齋往求釋於賊賊感其孝俾與父歸

李世第府志字三捷平江人崇禎十五年土寇許定凡聚眾數千糾合流賊破城殺弁踞邑半載官兵不能戢世第散家財募勇士數與賊戰克復縣城都御史何騰蛟上其功授副將尋致仕

福

童光楚縣志平江廩生張獻忠陷岳州散財募兵爲鄉里守禦比督軍何騰蛟駐長沙光楚以鄉勇隨軍勤王騰蛟授以虛銜令領兵擊賊與賊遇於巴陵之新牆力戰身被數矢猶奮勇斬殺遂死於陣土人殮之葬於新牆河側

沈以曦湖廣通志臨湘人由進士爲常熟令遷蘇州司理有松商被誣爲盜洗釋之蘓多文士以曦善於賞識多所獎成後謫補博興令告歸以曦孝友篤至居鄉恤窮急病惟恐後時友人某妻被掠稱貸贖還

有王承祥者負戴某金投繯幾死以曦爲代償之蕭露豐一統志字書年臨湘人張獻忠陷城與其妻

楊柱朝湖廣通志臨湘人順治己亥進士淹博有雋才令四川平武邑自獻賊蹂躪後滿日荆榛柱朝悉心招徠流亡復業人稱良吏

龔承宣縣志字來旬巴陵歲薦爲諸生時侷儻有大志博學爲古文詞不規規舉子業秉鐸嵩梁量移廣宗令清廉自矢苞苴絕跡修學課士祈雨賑饑創廣濟橋以通行強建義倉以濟孤貧漳河水決居民魚鼈捐貲爲東城閘做淮河制度自是水不爲城池民居患解組歸邑人焚香遮送

唐良璽縣志字崑伯平江人順治五年拔貢授廣東布政經歷署番禺從化二縣事有政聲以薦擢廣西

思恩府同知後改調河南府經歷署閩鄉縣事平反
冤獄閩民頌之康熙十六年大兵平滇寇督解協餉
有功議叙而良璽病卒

李德明府志字瑞毓巴陵人由吏材授贛州照磨康
熙十三年吳逆陷石城尋克復檄德明攝縣事增築
城陴屢戰有功擒獲逆將陳益逆復率眾三萬圍城

德明却之

楊為械府志字芑若巴陵人康熙丙戌進士知山陰
縣俗多假命噬人為械嚴圖賴之律風由是戢修築
馬鞍山丈五村海塘濤至民免於患以終養告歸後
補馬平縣尋致仕

孫枝府志字子桑華容人康熙己酉舉人授靖江知
縣恪謹奉母致仕歸母有督責必奉杖授母無忤色
孫祐岐府志字在鎬華容人康熙丁卯舉人授歷城
知縣清儉愛民濬縣東小清河以豫蓄洩歸併德倉
於大糧以省催科丁亥戊子連歲飢荒力請賑粥民
免轉徙尋以疾歸祀名宦

黎大觀一統志華容人康熙舉人知宜黃縣築永豐
陂建通津橋葺學宮置學田盡罷諸陋規擢戶部主
事

王祚葑府志字山長華容人儼之裔孫康熙庚午舉
人授武義知縣歲飢力為請賑百姓德之尋以疾歸

究心墳典閉戶撰述

吳堂府志字屆室華容人康熙庚辰進士授淄川知縣有民婦冤獄堂爲雪之以內艱歸服闋補光澤縣修繕城垣嚴於弭盜遷開州牧數月致仕歸堂生平淡泊寧靜居官不立崖岸所至有賢聲

潘楷府志字特書華容人康熙丙戌進士授翰林檢討貧而積學爲文蒼勁凌厲性行端方未幾卒於京

邸

侯三錫府志字觀來華容歲貢生平以厚道自處對人未嘗有忤色一門孝友內外無間雍正六年祀鄉賢

張召華府志字寶君華容人篤於友愛康熙乙丑成進士歷知晉江金谿二縣邑有大役激切陳請賑恤備至

鍾正章湖廣通志字漢雯平江人幼耽書史兼精楷法嘗以琴自適視一切世味淡如也已卯領鄉薦益留心濂洛諸書所著詩文甚富年六十餘卒於家

李嘗之湖廣通志平江人幼失怙恃聰敏有策畧善屬文然性端謹綏遠將軍蔡敏榮愛重之延置幕下甚久蕩平滇黔嘗之預籌畫凱旋擬奏注官嘗之力辭敏榮厚贈遺以歸見親知貧乏者卽周之緣手散盡以老病卒

戴煥文府志臨湘人性至孝母金氏病篤湯藥不效
潛割股肉和糜以進母忽愈越十載母病亦如之事
聞旌其門

劉士遴府志臨湘人本姓周爲劉氏螟蛉子事義母
鄧氏能盡孝道母病垂危藥餌不進士遴割股肉煮
以啖之母旋愈有司旌以純孝

張若齡湖廣通志臨湘人少隨母避獻賊亂山谷間
食絕若齡行乞奉母再罹滇寇挈家逃避母老艱於
行夜遇虎若齡以衣蔽母露坐達旦虎馴伏不爲害
三子俱登賢書人以爲孝感所致

楊雯春府志臨湘諸生父病禱醫誠切以老聞康熙
四十五年邑饑出穀數百石以賑雍正十年受旌
鍾宗憲縣志平江庠生父沒哀毀廬墓踰年以母老
待養乃歸母沒亦如之

江子儀府志平江人康熙五十三年邑饑出穀數百
石以賑嘗遇盜叔姪爭死賊義而兩釋之

單國成府志平江人事繼母以孝聞嘗寇至負母遠
奔足腓皆裂其妻亦勤於奉養爲母鍾愛年未三十
妻喪國成以母故終身不再娶雍正十一年受旌

許伯泰府志字魯瞻巴陵庠生其父聖行客長沙染
疫伯泰奔侍湯藥嘗糞禱以身代父少愈母李氏又
病疫於家伯泰從官府乞丸藥兼程馳歸膏漲沒於

水是夜其母猶夢伯泰齋藥飲之乾隆四年受旌
方顯字周謨號敬齋巴陵人由明經司鐸湘鄉陞廣
西恭城令有蓮花山產銀礦不逞者聚徒萬餘盤踞
爲患顯團練鄉勇設法驅逐數十年積患一時解散
雍正初舉賢員超授貴州鎮遠守抵任政平人和境
內大治五年郡阻饑民大困擾顯捐俸煮賑活民數
萬民建碑亭頌德顯弗許大學士鄂公爾泰時爲總
制竒其才委清理九股清大各苗疆顯身往開導投
誠隸籍者約十餘萬戶授貴東兵備道並總統軍務
在營文武悉聽節制顯勦撫兼施如公鵝鷄右等類
寨皆身率將士先後斬洗并請建城清水江以資控

禦尋陞貴州按察司仍兼理苗疆事務九股有台拱
爲諸苗出入要地顯奉

部命與總兵趙文英往營新城有墨引羊翁等寨頑苗勾逆

數萬圍營攻擾顯出奇計焚洗兩寨緣兵寡苗衆援
兵失利受圍六十九日糧盡宰馬以食衆請潰圍圖
後舉顯曰台拱關係新疆全局一不守古州丹江清
江諸苗寨皆煽逆矣况苟免失臣節脫奔損

國威不濟寧自及耳於是人人感奮已而大兵夾攻苗
敗走圍解因乘勝攻洗沓招大小台雄各逆寨會制
府尹繼善至顯具陳善後事宜咸見施行在任清理
積案獄無冤民廣順州民胡老大以枉繫爰書已定

顯察其冤訟死刑四人乾隆三年起內艱擢四川布政司清理錢糧釐剔蠹弊尋巡撫四川兼署提督印務蜀界連吐蕃有金川雜谷七土司相仇殺邊疆騷動顯委員開諭各酋長皆懾服罷兵蜀境以寧且劾貪劣崇節義鋤奸滑吏治民風應時丕變以勤勞致

日疾值楚粵邊苗不靖調撫廣西旋奉

諭旨四川路遠難以遣醫診視卽令在川調理俟痊愈時再赴新任

命未抵蜀而顯已舟次長沙矣粵苗旣平建城安營皆次第就理旋以病乞歸奉

溫綸命太醫院選員馳驛醫治且聽其或住廣西或歸本籍所遣太醫相隨診視歸里病益篤以乾隆六年十月卒於家

黃秀字實菴號道山巴陵人康熙癸巳舉於鄉辛丑登進士選庶常年已六十餘矣明年春

上賜羣臣六十以上者宴於

乾清宮乙巳

御試一等充治河方畧政治典訓兩館纂修官丁未授山東道監察御史協理山西道事上推廣

皇仁一疏條陳農桑勸課學使弊竇暨賑卹隄防諸大政數十言逾七旬致仕歸年九十卒

湖南通志卷之二十一

序

